

Mud Volapüka

Nüm 55

5 mayul 2017

Bukemaboed

Fövot lekoned-mära yutopik
„Ventürs hieła ‚Nenolikan‘ e flenas omik“
fa hiel „N. N. Nosov“

Kapit lulid. Vio Nenolikan ävabom me tood karbatazüdavatik.

Mufavan: ‚Skrübül‘ < ed yufan omik: ‚Lebuonül‘ < äbinoms mastanus vemo skiliks. Äleigoms tefü ods, te Skrubül äbinom geilikumu bosilo ka Lebuonül. Bofikans älenlaboms yäki küirik. Stums ferik valasotik: ginädöms, beitzäps, räps e retiks < ai sestegons se poks yäkas omiks. If yäks no binonsöv küiriku, täno poks ümosleitonsöv bü lunüp. Älenlaboms hätis koo küiriks, ko lünäts büg-a-sümik. Älenükoms lünätis at dü vob ad no miotön logis.

Skrübül e Lebuonül äbiliboms dü dels lölik pö voböp okik ed änätükoms lampadis, cafädis, cafedis, paälis; ab ven nos ädabinon ad nätükön, täno äjafädoms cilasaikulis ko luibs kil e tridavegömis pro lövikans votik.

Balna Skrubül e Lebuonül enunädoms nosi eke, enüfärmükoms oki pö voböp ed eprimoms ad jafädön bosii. Ünü mul lölik äsaovoms, ärabotoms, ästefoms, äsoldoms ed äjonedoms nosi eke, e ven mul epasetikon, pas täno eklülädos, das ifijafädoms toodi.

Tood at äjafidon me karbatazüdavat ko



Voböp elas: Skrubül e Lebuonül

sirup. Pö zänod tooda seadöp pro stiran päpladon, fo kel cub ko karbatazüdavat ästadon. Gasin karbatazüdik ämufon se cub da rüd ini zilid kuprinik ed ämufükon dränömi ferik. Dränöm ferik dub ped gasina äsleafon nu uso täno iso [äzisleafon] ed ätulükon luibis. Löpo sus seadöp bok ko sirup päpladon. Sirup äflumon da rüd ini cub ed äjonidon ad smivön cinädi.

Toods karbatazüdavatik somik päpakons bevü lövikans. Ab tood, keli Skrubül e Lebuonül ifijafädoms, älabon menodi bal vemo veütik: gum~~a~~rüdidil blegovik pifimaskrubon pö flan cuda, dat okanoy drinön karbatazüdavati no stopedölo ad vabön me tood.

Spidülan ifilärnom ad tölatön toodi at, ed if ek ävilonöv ad vabön [as tävan], Spidülan äveigom utani ed änoodom neke.

Sirupül äplidom mu pato ad vabön pö tood, bi äkanom drinön karbatazüdavati ko sirup sovemo vio ävilom pö vegam. Nenolikan koo äplidom ad vabön pö tood, e Spidülan suvo äveigom etani. Ab Nenolikan ävilom ad filärnön vio tölatön toodi ito, ed eprimom ad begön Spidülane:

„Letolös obe ad vabön pö tood. Koo vilob filärnön ad tölatön oni.“

„No ukanol“ - Spidülan esagom. - „Ga atos binon toodu. Nedos ad suemön pö atos.“

„Kisi nedos ad suemön pö atos!“ -

Nenolikan egesagom. - „Äküpedob vio ätölatol oni. Tiroyöd gleipädis e tulükoyöd stir~~a~~luibi. Valikos binon komuniku.“

„Atos jinon, das balugos, ab jenöfo fikulos. Ga it upäridikol ed utroivol toodi zuo.“

„Benö! o Spidülan!“ - Nenolikan ebadocedom. - „If obegolöv bosi obe, koo no ogivob uti ole.“

Balna, kü Spidülan äfabinom lomo, Nenolikan ebenüxänom toodi, kel ästadon tö yad, ed eprimom ad tirön gleipädis e klavön tridömis. Primo no äplöpom,



poso süpiko tood änoïdülön ed eprimön ad mufön. Lövikans eküpons atosi da vitür ed efiserönons se dom.

„Kisi adunol?“ - etans ävokädons. - „Upäridikol!“

„No upäridikob“ - Nenolikan egesagom ed ebo efidovabom dogadomi, kel ästadon zänodü yad.

Brekö! Dogadom edäbrekon ad cips. Nemu lebena, das dog: Bulül< eplöpon ad sebunön, voto Nenolikan id edovabomöv oni.

„Ekö! kiosi efidunol!“ - Nolikan ävokädom. - „Stopikolöd tü timül!“

Nenolikan edredikom, esteifülom ad stöpön toodi ed etirom gleipädi seimik. Ab tood, plas stopikon, ämufon plu vifikumo. Priel pekolkömon pö vegam. Brekö! Priel efidäfalön. Nenolikan pebejedon löliko me cips. Boed bal ekobojokon ko om len bäk, votik eflapon omi len nük.

Nenolikan egleipom stiraluibi ed äflekom [ästirom] toodi. Tood ärönon sovadiko pö yad, ed Nenolikan ävokädom lelaodiko:

„O kompenans, maifükolsös leyanis mu vifiko, voto ufibreikob valikosi pö yad iso!“

Lövikans efimaifükons leyanis, Nenolikan efidevabom de yad ed ärönom ve süt. Lövikans efiserönons de yads valik, efilelilölo noidi.

„Prüdö!“ - Nenolikan ävokädom etanis ed ärönom föfio.

Nolikan, Baülan, Skrubül, sanan: Pilulülan< e lövikans votik ärönons pödü etan. Ab miplöpo! No ekanons rivön etani.

Nenolikan äzivabom ve zif lölik ed no äsuemom vio stöpön toodi.

Fino tood erivon flumedi, edofalon se kliv ed ädaivülön donio. Nenolikan esefalom se on ed äposblijom ad seatön su jöl, ab tood karbatazüdavatik edofalon ini vat ed efinoyon.

Nolikan, Baülan, Skrubül e sanan: Pilulülan<



etovoms Nenolikani ed äblinoms lomio. Valikans äcedons omi ya deadiki.

Lomo ebedons omi, e pas täno Nenolikan emaifükom logis okik. Älogom züo ed esäkom:

„O kompenans, binob-li nog lifiku?“

„Binol fe lifiku“ - sanan: Pilulülan< egesagom. - „Bis, begö!, seatolös takedo [no mufedölo], sötol dalogön oli.“

Efisäklotükom Nenolikani ed eprimom ad xamön etani. Poso esagom:

„Seledö! Boms valik binons nätikü, te blütavuns e boadacips aniks komons.“

„Atos binon kodä ikobojokom ko boed len bäk“ - Nenolikan esagom.

„Nedos ad setiridön boadacipis“ - Pilulülan ekledükom koapi okik.

„Ab atos binon-li doliku?“ - Nenolikan ädredikom.

„Nö, go leno. Ekö! leadolös obi setiridön gretiküni anu.“

„Ag-ag-ag!“ - Nenolikan ävokädom.

„Kikodo agvokädol? Vo-li atos kodon eke doli?“ - Pilulülan ästunom.

„Lesi, doliko!“

„Tän besufodolös atosi. Atos te jinon somiko lü ol.“

„Nö, no jinos! Ag-ag-ag!“

„Ga kikodo agvokädol äsva kötob oli? Ga no kötob oli.“

„Doliko! It äsagol, das no dolos, ab nu dolos!“

„Takedolös, takedolös... Nedos [posblicos] ad setiridön boadacipi nog bal.“

„Ag, no zesüdos! No zesüdos! Gudikumo oblebob ko boadacip.“

„No dalos, obulädos.“

„Ag-ag-ag!“



„Ekö! Valikos efinikon. Te nog nedos ad besmivön me yodin.“

„Ab atos binon-li doliku?“

„Nö, atos no binon doliku [ad besmivön] me yodin. Seatolöd takedo [no mufedölo].“

„Ag-ag-ag!“

„No agvokädolöd, no agvokädolöd! Ga löfol ad toodaavabön, ab no löfol [no kanol] ad sufälön bosilo!“

„Ag! Kio lehitükos!“

„Olehitükos ed ufinedos. Anu upladob tärmometi len ol.“

„Ag! no nedos ad tärmomet! No nedos!“

„Kikodo?“

„Odalikos!“

„Ab tärmomet no kodon doli.“

„Ai sagol: no dalikos<, ab pas täno dalikos.“

„Bisaran kion! Vo-li äpladob neai tärmometi len ol?“

„Neai.“

„Ekö! Täno ufümetol, das atos no kodon doli“ - Pilulülan esagom ed emogolom ad tärmomet.

Nenolikan ejutedom se bed, ebumom se fenät pemaifüköl ed efugom lü flen okik: Flabül. Sanan: Pilulülan< egegolom ko tärmomet, älogom: Nenolikan fabinom.

„Ekö! lio lekälön malädani somik!“ - Pilulülan emurom. - „Lekäloy, lekäloy utani, ab bunom se fenät ed fugom. Lü [pro] kis atos pöton!“

Reidolsös fövoti konota pö nüm fovik.